



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Harry Kane-i Bundesliga nung otsü tasen ka yangluogo

US Treasury anitsü atema Trump-i Bessent nominate siüogo



VOL. XXII ISSUE NO. 45 (ADOK 45) DIMAPUR AMUNGNÜ (SUNDAY) YIMPOKSÜI (NOVEMBER) 24, 2024 ₹ 5.00

Minister Paiwang-i Mon Medical College semdang

Mon, November 23, 2024 (TYO): Health & Family Welfare Minister P. Paiwang Konyak-i November 23 nü Mon Medical College yangluba semdangogo.

Iba mapang Commissioner & Secretary H&FW, PD, department ketdangsürtem, Engineering Wing, district & police administration, district health committee members, DoHFW ketdangsürtem aser Konyak Union lennirtem liasü.

Mon nung yangluba Medical College ya Nagaland nung tanabuba lir aser physical work 25% tashi renemogo aser November 2026 tashi nung lapoktsü teimla lir.

Mon Medical College ya ali acre 93 nung Rs. Rs. 325 crore (90:10) endoka yanglutsü.

"Mon Medical College ya November 2026 tashi nung tembangtsü mapang züngzuka lir aser tang tashi inyaka aruba ama dang inyaka ora mapang shitak nung renemtsü" ta Er. Akang Jamir-i ashi.

Iba mapatong atema Rs. 325 crore (90:10) lemzüksüogo aser tang tashi nung state sorkar ket

nung central share Rs. 242.5 crore nguogo. Iba mapatong atema senotsü 10% aser physical progress 25% ta paisa ashi.

Konyak Civil Societies, Mon yimdaklirtem aser Village Council temi iba mapatong nung tetsükdaktsü kecha melii yaritepa aruba atema pelar ta Er. Akang-isa ashi.

Union Health Minister, Dr Harsh Vardhan-i February 26, 2021 nü Mon Medical College atema lung azünga yuja liasü.

Tanü Minister Paiwang den külemi Commissioner Secretary H&FW Anoop Kimchi, PD Dr. E. Motsuthung Patton aser tangartemi District Hospital Mon semdang.

Minister Paiwang-i anir teloki Mon DH hospital complex ajunga sema senzü aser iba sülen Hospital Authority den senden ka amen.

Pai mapatong merenem alibatem repringdangtsü, CMHIS/Ayushman card nungi anguba revenue timi amsihba aser nübo asadangtsü atema state ajungalen sema senzür ta ashi.

NDA-i Maharashtra aser INDIA-i Jharkhand yimsü asütsü

New Delhi, November 23, 2024 (Agencies): Maharashtra assembly election nung National Democratic Alliance (NDA)-i takok tulu nguogo aser BJP-i menden 130 tashi nguteta single largest party akümtsü.

Jharkhand assembly election nung JMM-Congress teloktepi exit polls tai kümja majority mark adenogo aser kümsük tanbabuba atema sorkar akümtsü.

Maharashtra nung tang sorkar yimsü tesüdak Mahayuti teloktepi ayongayonga dang halfway mark adenogo. Iba teloktepi nung BJP, Ajit Pawar'er NCP, aser Eknath Shinde'er Shiv Sena dena lir.

Honibar aonung 8:00 ako tashi nung Mahayuti teloktepi menden 227 nung takok nguogo aser menden 7 nung parnoki votes teimba ngua züngdar.

Külen, Maharashtra nung opposition Maha Vikas Aghadi (MVA)-i menden 46 nung takok nguogo aser ana nung parnok teimba ser votes züngdar.

Maharashtra nung assembly menden 288 lir aser iba nung majority mark 145 lir.

By-elections:

Honibarnü state 13 nung assembly by-election 48 aser parliamentary constituencies ana atema votes züngogo.

Parliamentary constituency anaji Maharashtra nung Nanded aser Kerala nung Wayanad lir.

Wayanad Lok Sabha by-election nung Priyanka Gandhi Vadra-i votes lakh 4 temai takok angu. Congress lennir Priyanka-i votes 6,22,338 angu, LDF candidate Sathyan Mokeri-i votes 2,11,407 aser BJP candidate Navya Haridas-i votes 1,09,939 angu ta Election Commission-i metetdaktsüogo.

Wayanad menden ya Rahul Gandhi-i toktsüba lir aser Congress atema kanga dang tongtipang by-election ka liasü.

Uttar Pradesh nung menden 9 atema by-election agiba nungi BJP-i menden 6 aser Samajwadi Party o Rashtriya Lok Dal ajanga menden anana nung takok nguogo.

Uttarakhand nunga BJP-i Kedarnath Assembly menden nung takok angu aser Kerala nung Congress candidate-i Palakkad aser CPI(M)-i Chelakkara menden nung takok angu.

Bihar nung NDA-i Assembly menden pezü nungi asem nung takok nguogo aser Hindustani Awam Morcha (Secular)-i ka nung takok angu.

West Bengal by-election nung Trinamool Congress-i Assembly mendentrokprongnungtakoknguogo.

Punjab nung Aam Aadmi Party (AAP)-i menden 3 aser Congress-i ka nung takok angu. Rajasthan nung BJP-i menden 5 aser Congress o Bharat Adivasi Party ajanga menden kaka nung takok angu.

Karnataka nung Congress-i menden asemprong- Sandur, Shiggaon aser Channapatna nung takok nguogo.

Assam nung BJP aser parnok den yaritepertemi assembly menden 5 by-election nung takok nguogo.

Dholai menden nung BJP candidate Nihar Ranjan Das-i votes 9,344 agi takok angu.

Sidli nung BJP den yariteper United People's Party Liberal (UPPL) candidate Nirmal Kumar Brahma-i votes 36,461 agi takok angu.

Bongaigaon nung BJP den yariteper Asom Gana Parishad (AGP) candidate Diptimoyee Chowdhury-i votes 34,499 agi takok angu.

Behali menden nung BJP candidate Diganta Ghatowal-i votes 50,947 ngua Congress candidate Jayanta Borah madak votes 9,051 agi takok angu.

Assam nung Congress tesem ta züngshiba Samaguri constituency nung BJP candidate Diplu Ranjan Sarma-i votes 26,200 agi takok nguogo.

NJQ (USA)-i Toyota Hornbill Music Festival nung shilem agitsü



Kohima, November 23, 2024 (TYO): December 2, 2024 nü 25 buba Toyota Hornbill Music Festival 2024 nung NJQ (USA)-i shilem agitsü ta Task Force for Music & Arts (TaFMA)-i tanü metetdaktsüogo.

Nikongdang 5:00 ako nungi main arena, Naga Heritage Village Kisama nung parnoki shilem agitsü.

NJQ (USA) ya jazz quartet ka lir aser Michael Glynn, Delbert Anderson, Reuel Lubag, o Ed Littlefield nunger züngsemtem lir.

Michael Glynn ya Seattle nungi bassist ka lir aser pai Eric Alexander, Dave Grusin, o Louis Hayes nunger den külemi shilem agiogo.

Delbert Anderson ya Diné jazz trumpet artist aser educator ka lir. Pai jazz, funk, aser hip-hop den Navajo "spinning songs" meyokteper aser Diné history lemsatepba den wazüka ayur.

Reuel Lubag ya multi-talented musician aser educator ka lir. Pai Pacific Northwest nung amenoker mapa inyaker aser Native Jazz Quartet nung tongti shilem agia arur. Paisa US Department of State indang American Music Abroad nunga shilem agiogo.

Ed Littlefield ya percussionist aser composer ka lir. Pa ya cultural ambassador ka lir aser film, theater, o stage atema composer ka lir.

25 buba Hornbill Festival atema senden ka amen

Dimapur, November 23, 2024 (TYO): 25 buba Hornbill Festival, 2024 atema maparen meyipa repringshiba senden ka menogo

November 23, 2024 nü Chief Minister Neiphiu Rio menden ser Rhododendron Hall, Police Complex, Chumoükedima nung senden amen.

Senden nung CM Neiphiu Rio-i Hornbill festival atema tajungba renemtsü tebilemba kar lemsatep. Mapatong balala mapang atemzuka aliba nung sayatsü ta paisa ashi.

CM Rio-isa 25th Edition Hornbill Festival atema commemorative coin ka den Hornbill Festival booklet sayatsü.

Senden nung Advisor to CM, Abu Metha-i Hornbill festival atema sentong balala atonga aliba lemsatep.

Hornbill Music Festival nung shilem agiba musical bands indang paisa ashi.

Iba sentong ya linük nung rock music events tulutiba rongnung ka lir aser India o bendanglen nungi bands aser artists arua shilem agir ta Metha-i ashi.

Deputy CM, T R Zeliang-ia national highway indang osang lemsatepdang "alima lendongtem ya asenoki mazüoketer" ta ashi.

Ajisüaka paisa bangdak department dang benjung matongdang lenmang nung garitem timi senzütsüsa

anepalutsü ayongzük.

Tourism Minister Temjen Imna Along-ia kobi melii Tourism Hornbill festival mobile application sayatsüba osang lemsatep.

CM Rio, Chief Secretary aser line departments ajak lenisüba kübok 25 buba Hornbill festival takok ngua amongtsü sentong renemba atema pelar ta Minister Along-isa ashi.

Chief Secretary, J. Alam, IAS-ia Kisama nung road, water aser power sector indang osang lemsatep.

Iba senden amenba sülen Chief Secretary Alam den külemi Home Commissioner aser tanga ketdangsürtemi Airport aser Railway station semdanga senzü.

Nagaland nung nisung 4056 shia atema doctor 1 atar

Dimapur, November 23, 2024 (TYO): Nagaland nung doctor-to-population ratio ya 1:4056 lir aser iba ajanga healthcare sector mejungi aliba sayur ta MLA Dr Sukhato A Sema-i ashi.

WHO ajanga doctor-to-population ratio 1:1000 asütsüla ta shia lir saka Nagaland nungbo 1:4056 lir ta pai ashi.

2011 census nung Nagaland nütsüng yongsük 19,79,000 liasü aser doctor 1,979 alitsüba liasü

Nagaland nung 2022 küm government doctors 390 liasü anungi

asenokrecruitmentpolicybalakaalitsü nüngdaker, ta Dr. Sukhato-i ashi.

Chumoükedima nung Nagaland In-Service Doctors Association (NTDA) annual conference-cum-general body senden nung jembidang "yipden 100 aliba mozü ki ka nung doctor 29 alitsüla" ta pai ashi.

"Nagaland nung empanelled general hospitals 81 lir aser itemji sorkar 64 aser nija 17 lir. Public-i hospitals aser doctors, nurses o paramedical workers nüngdakba atema NIDA-i mapa

inyaktsüla" ta paisa metetdaktsü.

NIDA-i sorkar dang medical officers, nursing staff aser tanga paramedical staff atema quarters amala tang nüngdakbatem meshitsüla. Iba nung state yimtiba nunga tongti ketdangsürtem atema quarters dena lir, ta Dr. Sukhato-isa ashi.

Pa ya Nagaland Health and Family Welfare Department nung taoba principal director lir aser NIDA dang quality healthcare agütsütsü alizüng atongtsüsa inyaktsü ayongzük.

Ao Kaketshir Telogjem, Kohima Science College Hon jubilee mungogo



Dimapur, Yimpoksüi/ November 23 (TYO): Ao Kaketshir Telogjem, Kohima Science College, Jotsoma Hon jubilee November 23 nü college auditorium nung mungogo. Iba sentong nung Metsubo Jamir, Minister, Rural Development & SIRD, Govt. of Nagaland tongti tejaoker aser Spongnuksü, IFS, Chief Conservator of Forest tongti o jembir liasü.

Jubilee sentong nung college kübok kin balala nungi lenirtem, taoba mapang Aoer kakethirtem, tesayurtem, non-teaching staff aser college nung kaketshirtemi shilem agia liasü.

Sentong nung Hon Jubilee Souvenir ya tongti tejaoker Metsubo Jamir-i sayatsü aser iba sülen o jembia liasü. O jembiba mapang pai technology renloka aoba mapang ka nung

iba ajanga asen sobaliba aser tetsü oshi ka kongshiba meita atatsü ajungshi.

Kasa mapang nung tongti o jembir Spongnuksü-i, kaketshir ka taküm nung tetsüdaksü balala ajangshia aoba mapang aremzüka atasa inyaksü koda tongtibang iba dak ajemdaker jembia liasü.

Sentong nung Kohima Aoer Telongjem tir Chubayanger-ia tajungshi o tatsüka jembiba mapang tetsü oshi wazüka ayutsü koda tongtibang iba indang lemsatop. Maneni Addl. Director (Rtd.) Higher Education Dr. Watjungshi Jamir aser Principal, Kohima Science College, Jotsoma Dr. Temjenwabang natia o tatsütsü jembia liasü.

Hon Jubilee nungdem nung Kohima Science College, Jotsoma atema takdang ka

yanglutsütsü asoshi Jubilee bangzüng committee-i benoka liasü.

Iba sentong ya ketdangpurtem lenisüba nung agi aser Pastor, Ao Fellowship, KSCJ. Mr. Sungjemmeren Imchen-i Tsüngrem temaotsü meshizüka sarasademer tenzü. Sentong nungsa AKTKSCJ tir Sungjemmeren Imchen-i lokti pela agizükba o jembia aser Kohima Science College Students Union General Secretary M. Shamba Phom-i kaketshirtem ajak tenüng nung Jubilee salem lemsatop.

Maneni Rev. Yashila Jamir, Assoc. Pastor (Women), KABA-i temaotsü meshizüka sarasademtsü aser Moa Imsong, Assoc. Pastor, City Church Kohima-i tatembang sarasadem agia liasü

Minister Paiwang-i Tuensang semdang

Dimapur, Yimpoksüi/ November 23 (TYO): Minister of Health and Family welfare, Paiwang Konyak-i November 21 nü District Hospital, Tuensang semdangogoo.

Pa kanga pelashishia agizükba atema District Hospital staff tem dang kanga pelaba lemsatopba den Minister-i, pai mozüki semdangba ya official bo masü saka district nung infrastructure aser terenlok

maparen matoksa alibatem asadangtsü asoshi lir ta ashi.

Paisa, sentepa aliba lokti dang state nung Medical Doctor tem agi kanga anünger aser talisa specialist Doctor tem agi anünger, aser sorkari iba tawa ya süngdaksütsü atema takokba tashi inyakdar, ta ashi.

Paiwang-i, pai mozüki semdangba nükjidong tongtibangtibaji district nung Food Safety and Drugs Control

dak sendakba nung ken o tem asadangtsü asoshi lir, ta ashi.

Minister mina Commissioner & Secretary, Additional Director, Principal Director aser Department of Health and Family Welfare nungi Senior Doctor tem oa liasü.

Kasa mapang nung CMO Tuensang Dr. Imlitemsu Ozukum-i district nung department inyakyim indang power point tatsüka agüja liasü.

EDTC-i teka amteper inyaksü mepeshi

Dimapur, Yimpoksüi/ November 23 (TYO): East Dimapur Town Council-i sangdong ka ajanga, lenmang tajungba küma yanglushitsütsü aser nüburtem tekümzüka kübok toktsütsü nükjidong nung East Dimapur Purana Bazar Police point junction nungi

Dhansari apu (supermarket-i aolen) tashi lenmang yanglushiba mapang nüburtem dang teka amteper inyaksü mepeshia metetdaksüogo.

Anüngdang nüburtem senzüsensong nung timtem magütsütsü atema 23/11/2024 nü nungi tenzüka mapa madem

tashi aonung 8 ako nungi anepdang 6 ako tashi mapa inyaksü, ta kasa sangdong ajanga metetdaksü.

Atakzükja aliba mapang tenokdangba kar agütsütsü aser gari anishirtemi lenmang shidak agütsü atema temaitsü tapet agütsür alitsü, ta metetdaksü.



Dimapur Langpangkong Senso Telongjem küm tatem lokti senden November 23, 2024 nü Senden Reju nung alidang Dimapur Langpangkong Watsü Telongjem nungi tetsürtemi ken atenba noksa nung angur. Iba senden nung Wb. Sashimar Jamiri tsiyongzükba o jembia liasü. Iba senden nungsa DLST lenitsü asoshi mendenpurtem tasen shimogo. Parnokji Tir Wb. I. Sanen Longkümer (Yaongyimsen), Tadong tir Wb. Limawapang Jamir (Changtongya), Tongti zülur Wb. Temsüyanger Longkümer (Unger), Repsem zülur Wb. Tangit Jamir (Asangma) aser Senotsü Ketdangser Wb. Aosanen (Chakpa). (Dimapur, November 23, 2024).

3buba Social Audit Public Hearing agiogo

Dimapur, Yimpoksüi/ November 23 (TYO): District Rural Development Agency (DRDA), Kohima aser Nagaland State Social Audit Agency (NSSAA) na longjemer 3buba FY 2024-25 Social Audit District-Level Public Hearing November 22 nü DC Conference Hall, Kohima nung agiogo.

Hearing mapang FY 2022-23 atema Mahatma Gandhi National Rural Employment Guarantee Scheme (MGNREGS) aser 2019-20 atema Pradhan Mantri Awaas Yojana-Gramin (PMAY-G) benoka inyakba lepa reprangshia liasü.

Tasembuba shilem nung Kohima district kübok Chiephobozou aser Botsa RD Block nungi yimtsüng 12 audit süa liasü.

Hearing sentong ya Project Director of DRDA Kohima, Kevilhoubai-ü lenisüba nung agi, shibai ketdangsurtem aser sentong nung shilem agirtem pelashishia agizüka liasü.

Okila jembiba mapang NSSAA Assistant Director Imlirenla Sanglir-i, project guidelines tem sülen anidaksü asoshi meranga inyakba atema programme functionaries aser implementing agency tem nem tenüngsang agütsü aser kümtem tsüngda mapatem takok ngua inyakyonga aoba indang metetdaksü.

Laisa, social audit ajanga ngutetbatem bentettsü koda tongtibang iba indang lemsatopba den stakeholder tem dang metongshia inyaksangshitsü mepeshia liasü.

Sentong nung Development Officers (BDOs), DRDA officials, MGNREGS beneficiaries, yimtsüng ketdangsurtem, aser Village Level Organisations (VLOs) temi shilem agia liasü.

Yimtsüng sasep nung audit ajanga ngutetbatem tatongi zünga metetdaksüba den project tem takok ngua inyaksü atema bangzüng yanglubatem sensak asema sülen iba hearing sentong ya tembanga liasü.

BPCC(A-N)-i ayongzükba consultative senden menogo



Dimapur, Yimpoksüi/ November 23 (TYO): BPCC(A-N)-i ayongzükba Assam-Nagaland arrtsü nung aliba Jungle Block aser Bongshi Gopal High School nungi tesayurtem aser Friendship Forum of Tzurangkong na tanü Jungle Block High School nung consultative senden ka menogo.

Taruba küm January ita Tzurangkong Govt. High School nung anogo asem Students Exchange Program ka akatsü nükjidong nung Honibarnü senden ya ayonzükba menogo. Students Exchange Program atema Jungle Block HS aser Bongshi Gopal HS nungi kaketshirtem Tzurangkong High School-i jaoktsü.

Friendship Forum (Tembayim Committee) of Tzurangkong züngsemtem aser Tzurangkong Katetshir Mungdang tir Pangertoba Pongen nungeri tanü sensaksem nung shilem agia liasü.

Senden nung iba exchange sentong ya January 30 nungi February 1 nü tashi agütsü telemtetba agiogo. Iba sentong atema Assam nung amendaker aliba school ana nungyagi kaketshir 30 (class teku pur) shimtsü.

High school anaprongla nungi

tesayur kar aser tsürapurtema iba sentong nung shilem agütsü jaoktsü.

Friendship Forum aser Tzurangkong Kaketshir Mungdang-i, sentong nung shilem agirtem achi ajemtsü aser anenzüktsü asoshi anepalutsütsü. Iba inyakyim nung Chungtiayimsen aser Watiyim yimtsüng nungi kibongtemi kaketshir ka aser tsürapur sponsor asütsü. Yimtsüng ana ya Tzurangkong Govt. High School den atonga lir. Kasa mapang nung Assam High Schools ana nungi tesayurtem ya Tzurangkong High School tesayurtemi sponsor asütsü.

Anogo asem sentong ayongzükba agiba mapang kaketshirtem atema sentong balala renemja lir aser iba den Assam nungi tsürapur aser tesayurtema sentong balala nung shilem agia sendaktepdaksütsü.

Honibarnü senden ya BPCC(A-N) tir Jiten Buragohain aser tatong tir O. Sangpang na lenisüba nung agi. Assam aser Nagaland nungi telemtetba agiogo. Iba sentong atema Assam nung amendaker aliba school ana nungyagi kaketshir 30 (class teku pur) shimtsü.

High school anaprongla nungi



November 23, 2024 nü Washington D.C nung Indian-American lenirtem Global Equity Alliance Summit nung adendang tangokba noksa nung angur.

Maharashtra nung BJP aser Jharkhand nung JMM-i takok angu

New Delhi, Yimpoksüi/ November 23 (Agencies): Maharashtra aser Jharkhand nung assembly election agiba votes Honibarnü zünga osang sangdonggo.

Maharashtra nung BJP-i aniba Mahayuti teloktepi takok angu aser Jharkhand nung JMM-i takok angu. West Bengal by election nung TMC-i takok angu aser Karnataka by election nung Congress-i menden asemprongla nung takok angu.

Maharashtra nung BJP-i aniba Mahayuti teloktep aser Congress, Shiv Sena (UBT) aser Sharad Pawar-i aniba Nationalist Congress Party teloktep (Maha Vikas Aghadi) na tsüingda toktepa liasü.

Maharashtra Chief Minister Eknath Shinde-i BJP-i aniba Mahayuti-i takok angubaji talisa Ladki Bahin scheme ajanga lir, ta ashi.

Honibarnü votes azüingdang Mahayuti-i takok angutsü tejangja, ta metetba sülen Shinde-i, "Ni state nung ladki bahins (temeim aianutsür) aser adianutem aikati onok nem vote agütsüba atema pelar. Onoki terenlok mapa inyakba ajanga aikati onok nem vote agütsüogo. Onoki inyakba mapatem nüburtemi nguogo aser votes ajanga telangzüba agütsüogo," ta pai metetdaksü.

Taküm August ita nung Raksha Bandhan anogomong nung tenzükbä Ladki Bahin scheme ajanga Maharashtra

nung ita shia tetsür crore 1 dak tema nem sen 1,500 agütsür.

Iba scheme ya Madhya Pradesh nung Shivraj Chouhan-i aniba sorkar indang 'Ladli Behna Yojana' scheme den mesükteper.

Election atema nüboyimdang Eknath Shinde-i sensotem dang, state nung Ladki Bahin scheme ya mapang telatet makai alitsü, ta nangzüka liasü.

Iba scheme mezüing tenzükdang temsüa alir tetsür lakh 30 dak talii parnok indang bank account nung sen 3,000 ngua liasü.

Maharashtra sorkari 'Nari Shakti Dhoot' application tenzüik aser ibaji ajanga temsüa aliba tetsürtemi online ajanga register süteter.

Iba scheme atema register asürtemi Aadhaar aser parnok indang bank accounts sendakteper, iba dak alia bank nung inyakertem danga iba inyakym nung tetsürtem den yaritepang ta tuyua lir.

Jharkhand election nung BJP atema tongti nüboyimerji Assam chief minister Himanta Biswa Sarma liasü, ajisüaka parnoki tamakok angu.

Chief minister Hemant Soren leniba nung Jharkhand Mukti Morcha (JMM) party-i state nung tang takok tuluba nguogo. JMM-i aniba INDIA teloktepi assembly menden 81 aliba state nung two-third majority angu.

Jharkhand nung nüboyimba mapang Assam Chief Minister

Himanta Biswa Sarma-i ozüing alema Bangladesh nungertem state telungi aitba anema jembia liasü.

Jharkhand nung BJP atema tongti nüboyimertemji Sarma den Shivraj Singh Chouhan liasü.

Ato kilonser Narendra Modi, Union home minister Amit Shah, BJP Tir J P Nadda aser Uttar Pradesh chief minister Yogi Adityanath nungeria Jharkhand nung ozüing alema Bangladesh nungertem aruba nokdangtsü atema jembia liasü.

Madhya Pradesh chief minister Mohan Yadav-ibo, JMM-i aniba teloktepi Jharkhand yimtiba, Ranchi ya Pakistan nunger yimti Karachi ama kümdaktsüdar, ta jembia liasü.

Ajisüaka Jharkhand nung JMM-i takok anguba ajanga BJP lenirtemi jembiba oji state nüburtemi magizüktetba kuli sayuogo.

Election atema nüboyimdang Hemant Soren-i talisa Maiyan Samman Yojna scheme indang jembia liasü; iba scheme kübok arrshi küm 18 nungi 50 tsüingdapur tetsürtem nem ita shia sen 1,000 agütsür, ajisüaka election osang sangdongba sülenbo tetsürtem nem ita shia sen 2,500 agütsütsü ta pai nangzüka liasü.

State sorkarisa aluyimertem dang sen lakh 2 tashi loan sentsüh atok, aser ibaji ajanga aluyimer lakh 1.75 tajangzüik nguogo.

Taküm Bastar nung sepaitemi Maoists 200 tepsetogo

New Delhi, November 23 (Agencies): Hokolbarnüa Chhattisgarh state kübok Bastar region nung sepaitemi Maoists telungpur ter tepsetogo, aser ibaji densemabo taküm küm tenzüker tang tashi nung sepaitemi Maoists 200 dak tali tepsetogo.

Hokolbarnep 9:00 ako meta Bheji police circle kübok arem nung sepaitem aser CPI (Maoists) indang armed wing People's Liberation Guerilla Army (PLGA) na tsüingda khatep; minute 90 shi khatepba mapang nung Maoist 10 khaset.

Hokolbarnü Maoists 10 khasetbaji densemabo taküm küm tenzüker tang tashi nung sepaitemi Maoists 207 tepsetogo. Taküm küm tenzüker tang tashi nung Maoists 787 puogo aser

Maoists 789-i 'surrender' süogo.

Anogo ana tejaklen Chhattisgarh Chief Minister Vishnu Deo Sai-i Union Home Minister Amit Shah ajurua 2026 küm March ita tashi nungbo Chhattisgarh nung Maoists ajak samatsütsü nükjidong yur inyakba maparen osang metetdakja liasü.

Brihostibarnü Ministry of Home Affairs kima osangbenertem den jembidang Sai-i, "Tesüiba ita 11 tsüingda Maoists 200 jungnüa tepsetogo aser Maoists 600-700-i 'surrender' süogo. Ato kilonser aser Home Minister nati 2026 küm March ita tashi nungbo linük nung Maoists samatsütsü nükjidong ayuba ataloktsü atema onoki inyaker," ta metetdakja liasü.



November 23, 2024 nü Thane nung Maharashtra Chief Minister Eknath Shinde-i takok anguba temaitsü sayudang tangokba noksa nung angur. Maharashtra Assembly election nung BJP-i aniba Mahayuti teloktepi takok nguogo.

Wayanad by election nung Priyanka Gandhi Vadra-i takok angu

New Delhi, November 23 (Agencies): Kerala state kübok Wayanad Lok Sabha by election nung Congress lenir, Priyanka Gandhi Vadra-i takok nguogo; tang mezüing lai election nung toktepa takok angur.

Lai CPI candidate, Sathyan Mokeri madak vote lakh 4.10 tali agi takok angu.

Election Commission-i ashiba agi, Priyanka Gandhi-i vote 6,22,338 angu, Mokeri-i vote 2,22,407 angu aser BJP-i aniba NDA teloktep candidate, Navya Haridas-i vote 1,09,939 angu.

Election osang sangdongba sülen Priyanka-i X ajanga, "Wayanad nung kü aianutsürtem aser adianutem, nenoki kü dak temelung lemtetba atema ni kanga pelar. Tang ni takok anguba ya nenok takok, ta tarutsü nung nenoki metettsüsa ni inyaktsü. Parliament nung nenok asoshi ola adoktsütsü ni yongyar," ta metetdaksü.

Laisa lar kibong züngsemtem, election nüboyimba mapang yaritepertem aser UDF teloktep dang pelaba lemsatep.

Lok Sabha nung opposition lenir Rahul Gandhi dang pelaba lemsatepa lai, "Kü adinau Rahul dang, parnok ajak dang nungi

tasütaitbaji na. Kü dang lenmang sayuba aser mapang ajak nung ni nungitba atema nü dang pelar," ta metetdaksü.

IUML tongti lenir Panakkad Sadiq Ali Shihab Thangal aser National General Secretary P.K. Kunhalikutty nati, tesüiba mapang Rahul Gandhi-i takok anguba dang nungi Priyanka-i takok tuluba angutsüa akok ta asangteta liasü; ajioda yamaji atalok.

Taküm Lok Sabha election nung Rahul Gandhi-i Kerala kübok Wayanad aser Uttar Pradesh kübok Rae Bareilly menden naprongla nungi takok ngua liasü. Iba sülen pai Wayanad menden azüingtetsüba ajanga by election agütsüsa aküm.

Taküm April ita nung agiba Lok Sabha election nung Rahul Gandhi-i vote lakh 3.64 ngua liasü, 2019 küm election nunga pai vote lakh 4.31 ngua liasü, saka tang Priyanka Gandhi-ibo vote lakh 6 dak tali nguogo.

Priyanka-i nüboyimba mapang nung nüburtem den kanga junga sendaktepteta liasü ta aikati bilemer. La ya Congress nung kanga tongtibang lenir ka ta ajaki agizüktetba ajanga aikati la nem vote agütsü ta bilemer.



November 23, 2024 nü Chennai nung Communist Party of India (Marxist) züngsemtemi Ato kilonser Narendra Modi aser businessman Gautam Adani na anema longkak aيتدang police-i parnok apuba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, NOVEMBER (YIMPOKSÜI) 24, 2024

Shisatsü temerük

Asenok jembishinü aser inyaksangshiba yimyayimpong agi asenok mulungjang sayur. Tetezü, asen mulungjang mesüra mulungsentsü memerüki tamajung dang bilema lira, asenoki tangar daka tamajung dang reprangtetsü. Ibayongji, Yisui asenok dang Luke 6:42 nung asenok tenük nung aliba anak tama endoker külenang tangar tenük nung aliba anak repringtsü ajungshia lir. Atangji, asenoki tenük agi angur saka asen mulungjang nung kechi bilemer iba amaji dang asenoki repringtetsü. Aji oda, asenok mulungjang memerüki lira, asenok tenük agi tangar dak tajung aliba merepringtetsü. Ajisüaka, kadang asen mulungjang merüka lidir asenoki tangar dak tajung aliba repringtetsü aser tangar indang tamajung mebilemtsü. Tenyar Paul-i pa den külemi Tsüngrem wadang nung temulung ka ser inyaksang Tita dangi züluba shiti nung, "Temulungsentsü merüka alirtem atema ajak temerük asütsü saka temulungsentsü memerüker aser mamangba purtem tsüngdang ajak memerük asütsü, kechiyong parnok shisatsü aser temulungjang memerük lir," ta Tita 1:15 nung shia angutsü. Kodang, asenok mulungjang nung tajung bilemer, asenoki tangar anema mebilemer aser tangari tamajung bilemyonga asenoki item tamajung melena tajung agütsütetter. Tangar majung masukba aser tangar nungsen mejembiba tebang temeliji shisatsü temerük adenba purtem dak keta lir. Item jagi tangar tai mapur saka kechi tajung aji repringa tenüngsang agütsür. Iba jagi adianu aser medemertem rongnung teputep adoker. Shisa tajung aser temulung temerük nungi temeim adoker aser tangar asoshi tayari aser temoatsü angudak taküm ka akümer. Aji oda, Mathi tapu 6:22 nung Yisui asenok dang angatetdaksünüba o tongtimbang kaji ,asenoki tangar dak tamajung ajitetra asenok pelaa malitsü aser iba mepelabaji tulu asütsü saka asenoki tangar dak tajung ajitetra asenok kanga pelaa alitsü ta shia lir. Aji oda, asenok libaliro nung asenok tamangertem asoshi tongtimbang kaji, asenok temulungjang aser shisatsü merükmerüka alitsüba ya lir. Asenok shisatsü memerüki lira asenoki angashiba kecha nunga tajung mangatetsü aser shinga daka temulung malemtsü. Tanübo asenoki asenoksasa asenok mulungjang ken meyipa repringdangdi. Asenoki tangar indang tamajung bilemer asü? Tangar dakbo tamajung-tamajung dang repringtetter asü? Nai tangari inyakba mapa ajak nung aija anidaker asü? Iba ama shisatsü agi na mepelateti lira, tang nai Tsüngrem dang nü mulungjang, nü mulungsentsü aser nü shisatsü ajak merüktetjang ta shiang. Nai Tsüngrem nem nü mulungjang tejenbaji agüjang aser aji tasen temerük ka agi melenjang ta shiang. Nai ochi mulung agi, Tsüngrem dang shisatsü tajung adenba temulungjang temerük ka aginer ta shira, Pai nü nem iba temulugjang temerükji agütsütsü aser tanü nungi na pelaa alitsü. Ibaji na asoshi shi atema mozü tajungtiba aser tanüla asoshi tekümtet jenjang tulutiba angur asütsü.

OLEMSABANG

ONOK KÜLEMI NÜ TENÜNG NUNG SENTEPER

~ L. Kika Pongener.

Revival aliba shia... Onok külemi nu nung nung senteper" ta arogopur ajungai kanga jangra-pangraa teka madena, ken anishia, temenungratsüka kodak pezüa atener. Revival ken aika atener, saka iba ken ya arogopur ajaki kanga sapuba ken ka asütsü sudi. Atangji, iba ken ya tantsür-tambur aser tanür-tain ajungai kanga sapua atener. Surabangla, ken nung "Onok külemi Yisu tenüng nung longjemer"... ta atenba amaji tamang ka, tanela ka aser temulungjang ka ser atener asü (?) Mesura kati ka ajungba majinui, kati ka dak tenükmerema, kati ka den arishitepa, kati ka den tsükchitepa külemi mener atener....???

Kangasa tesasatsüka, arogo nung külemi tenzüker tsüngda nung meputep, toklang tenzüker tsüngda nung meputep, Deacon-tem tsüngda nung meputep, tenzükla tsüngda nung meputep, mapangser/mapangtzür rongnung meputep, evangelistic telok rongnung meputep, counselor rongnung meputep, shiner/mangdanger rongnung meputep, choir rongnung meputep, lanurtem rongnung meputep....Toklang tenzüker rongnunga arogopurtemi ni taginuba....Sermon, Topic, Bible Study ni tajungba jembir/agir ta tokteper....Deacontem rongnunga ni tashiba ta....Tenzükla rongnunga ni tashiba ta....Counselor, shiner, mangdanger rongnunga ni-ang shitakba shiner....Tsüngremi kü den-ang shitakba jembir.... ta kati ka aitsüteper.

Revival sentep nungpo "Onok külemi nu nung nung senteper" ta teka madena ken anishia atener. Aji oda, asenoki atenba/jembiba den asen mapa khenyongi meputep. Mapang shia Jila tulu arogotem nung 'Asentenshi' sentong tulu ayonga akar....Iba Revival nungji arogotem, Ministry, Prayer Center aser Para Churches balala nungi aika arua adener....Aser "Onok külemi nu nung nung senteper aser longjemer"...ta teka madena atener. Surabang, ken atenba amaji tamang ka, tanela ka aser temulungjang ka ser senteper asü masü (?) Laishiba nung...."Kong ana mesura asem kü nung nung sentepa lir, yangji ni parnok rongnung dena lir" (Mathi-18:20)....ta shia angur. Tsüngremji anutok-anulo aser anutoktip-anulotip ajak nung lir. Surabang, koba tesem nung kechi telok sentepdir....Iba telok nungji Tsüngrem atener asü madener....???

Iba sentepbaji Tsüngremi mulongba asü masü...???

Iba telok nungji Tsüngremi mulongba mapa inyaker asü meinyaker...???

Atangji, Tsüngremji ajak nung lir....Saka Tsüngremji pai memulongba telok aser pa madentsüla telok nungpo madentsü sudi. Anungji asenok sentepba telokji Tsüngremi mulongba telok asü masü (?) Ibaji kanga junga shisadangtsü kangasa tongtipang lir.

Tanü putu nung arogopur aika pei arogo toktsür, tanga telok sentepi aoba angur. Lanurtema aika tanga telok sentep nungang oa jangra-pangraa adenba angur. Ano lim arogotem nungi razüka tanga telok tenüng jateta tenteta aoba angur. Tatishitsü....Prayer Center, Healing Center, Ministry aser Para-Churches, yamala telok kar asütsü akok. Aji oda, koba telok sudir suang....Iba telokji mungdang aser arogo atema nükdang tajung asü masü...???

Iba telokji mungdang aser arogo tazüokba küpok alir asü malir....???

Iba telokji mungdang aser arogo den sentaktepa lir mali...???

Asen sobaliba den liromedema litetba aser sobalibai melaba ama beshiba telok asü masü....???

COVID-19 wara tesashi mapang arogotem nung tenla-kidang lokti tulu külemi mener mekülemtsü atema tazüokba ozüng ka liasü....Iba mapang telok karbo lokti tekülem sentep odang aliba angazüka aruogo. Iba tazüokba ozüng-to Khristan yimsu nokdangba-a masü, tekülem sentep aser sarasademtsü nokdangba-a masü....T enla-ki shibanga ayuba-a masü....Saka tashitak nungi kümzüktsü aser tashitak memenateptsü atema lokti mesenteptsü tazüokba ka dang liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'Shine Your Light' kübok Arogo 1000-i Khristmas osang proktsü



Yaküm December ita nung UK nung 'Shine Your Light' campaign kübok bus station ka nung carol agidang tangokba noksa nung angur.

November 23, 2024: UK nung Arogo 1000 dak temai lintük tesem ajaklen Tenla kitem ajanga moapu balala nung Khristams tepela osang proktsü atema campaign ka tenzükogo. Khristan denomination balala, prayer networks & streams aika 'Shine Your Light' campaign kübok longjemogo. Parnoki Khristan 100,000 shi ayongsemer nisung million 1 den Khrista osangtajung lemsateptsü. Carols densema Khristmas dak sendakba sentong balala

Tenla kimatem nung agiba dang masü saka shopping centres, yimsüngtem nung moapu, community centres aser lokti adenshiba moapu balala nung item ama sentong agitsü atema parnoki Arogo 1000 ayonger. Yaküm December ita nunga Arogo 700 nungi Khristan 78,000-i Tenla kima adener tesem balala nung carol sentongtem agia liasü, aser ibaji UK Arogo nung Khristmas sentong tulutiba liasü. Taküm 'Shine Your Light' campaign ya December 13 nungi

December 15 tashi agitsü, saka Arogotem dang iba campaign atema register süa angati teyari balala agitsü ajungshir. Iba campaign pusemba telok Churches Together in England-i, "Shine Your Light ajanga chichiba Khristmas tezeü nenshia metetdaksür - Tsüngremi alima nem nisung ka ama Yisu Khrista agütsü. Denomination balala nungi Arogo 54 züngsema aliba teloki longjemer iba Khristmas mapang ya 'Iba mongpu ya Yisu ajanga lir ta sangdonger'," ta metetdaksü.

Kenya nung sorkari sen aika agütsü saka Arogoi magizük

November 23, 2024: Kenya nung sorkari Catholic Arogo nem dollar sen 40,000 agütsü saka Arogoi magizük. Putir atema ki ka asütsü, choir nem sempet agütsütsü aser Arogo bus ka alitsü atema Kenya Tir, William Ruto-i Arogo nem dollar sen 40,000 agütsü saka Arogoi magizük. Nairobi nung Catholic Archbishop, Rev. Philip Anyolo-i, yimtenren ajungkettsübaji Arogo tangatetba masü, ibayongji Arogoi senji magizük, ta metetdaksü. Paisa, iba ama tenla agütsübaji Arogo tetuyuba aser Kenya temzüng alema lir; tamalen-a Nairobi Governor, Johnson Sakaja-i Arogo nem tenla agütsü, saka Arogoi senji pa nem meyipa agütsüogo, ta

metetdaksü. "Arogo sentongtem nung fundraisers aser yimtenren nung kar ajungkettsütsü atema sabang agütsübaji Arogo tangatetba anema lir," ta Archbishop Anyolo-i ashi. Kenya nung Arogo aser sorkar na tsüngda mangatetep tuluba dang akümba mapang ka nung Tiri tenla agütsüba Arogoi magizüker. Küm asem tejaklen Arogotemi tenla atema sabang amshitsü asoshi yimtenren lenirtem nokdanga liasü. Taküm küm tetenzüklen longkak aiter lanurtemi hashtag #OccupyChurch amshia saru atuba anema Arogotemi ola madoker, ta aija liasü. Ibayongji July ita nung Tir Ruto-i aniba sorkari finance bill

agientsüsa aküm. Taoba hopta Kenya Conference of Catholic Bishops-i, sorkari yazü jembiba sobaliba ajungkettsür, ta aija liasü. Arogoisa, ketdangsertemi saru tali agiba, oshimashi aser tenanzükba balala mataloktsüba atema sorkar nem tai tongloksü. Catholic Arogoi pusema Anglican Archbishop, Jackson Ole Sapit-i, putirtemi tebilemstü onük balala lemsatepbaji Kenya nungur aika tebilemba den kasa, ta ashi. Kenya nung Khristantem teimbaka Catholic lir. Linük nung nütsüng shilem 20 shi Khristantem lir. Kenya nungsa evangelical aser Anglican Khristantema lir.

Malaysia nung MP kati school nung Bible Studies züngoktsü mepishi

November 23, 2024: Malaysia nung Parliament züngsem kati local primary school tem nung tanaben Bible Studies züngoktsü mepishi, ta International Christian Concern (ICC)-i metetdaksü. Malaysian State of Sarawak, Borneo nungi Bukit Semuja züngsem, John Ilus-i Sarawak nungur loktiliba nung Khristan missionary temi tongtibang shilem agiogo, talisa missionary temi shisaliok nung tongti shilem agiogo, item Khristan missionary temi shisaliok nung Bible studies züngokba ajanga putu aika Sawarak nungertem taküm libaliro aser tanela jenjang tashi itta liasü, ta metetdaksü. 1848 küm mezüng British

Anglican missionary tem Sarawak state-i arua liasü. MP Ilus-i, "Sarawak nungur lanurtem nem Bible studies agütsütsüla aser Khristan tamang indang angazükdaktsütsüla; tang school curriculum nung lanurtemi tanga yimsü balala angazükba ama Khristan yimsü-a angazükdaktsütsüla," ta ashi.



John Ilus

November ita tomlen Legislative senden nung Ilus-i Ministry of Education nem iba temepishiba ya agüja liasü. Education, Innovation & Talent Development Minister, Datuk Seri Roland Sagah Wee Inn-i Ilus dang, nai benokba tebilemba onükji education ministry-i asadangtsü, ta ashi. Malaysia nung Khristan nütsüng million 3 shi lir aser iba nungjagi Khristan million 2 bo Borneo (Sarawak aser Sabah states) nung lir. Sarawak nungur nütsüng shilem 50 shi Khristantem lir, aser ibaji ajanga akhidang nungi east Malaysia nung Khristan yimsü tera yanga aliba kuli sayur.

ANOGO ABEN TSÜNGREM DEN

TSÜNGREM ASEN JENOKDAK

Mongzüi pei tesepe raksaja, pei techanu madak yimzüba ama, pai pei tashikang sarar parnok agizük, pai pei tashikang nung parnok aben. Tazüngkunem 32:11

Iba Lai tekong nung Mosai Tsüngrem taochi aser pa temeim indang mongzüi koda pei techanu wazüka kümzük, aser chiyongtsü agi parnok tain maküm tashi mesür iba den abitepa zülua lir. Ano Isaia 40:31; saka shirnoki KIBUBA dang ata-a alir parnok tashi tasen angutsü; mongzütem ama tashikang agi atutsü; parnok asemstü, aser aniseta malitsü; parnok jajats?, aser melulatsü. Temeshi lai zülurtemi Laishiba nung mongzü indang ya 33 ben tashi tatishitsü amshia zülua lir. Kechiba süra ozü rongnung mongzü ya kanga balaka lir. Parnok küm 70 tashi arishi akar, tsünglu aser tsüngsak mopung arudang mepet atena parnoki yima atur aser pa tsünglu agi kodanga majashir. Parnok tetsüng agi ametbaji nisungi ametba dang nungi terben agi tashi taitba, parnok tenük tiben agi nisung dang techiraba ta ashir.

Iba ama Tsüngremi pa chirtem pa tashi nung awabanga nüka alitsü. Aser tamanger shiai Tsüngrem dang nungi tashi agitsüba aser pa dak dang jenoka alitsüla. Tsüngrem asen jenokdak aser tashi, timtem nung anasatiba teyarir. Anungji alimaji anakshiaka, aser tenemtem, tzüyim tiyongi ajungkokaka onoki metsübutsü;... T.Ken 46:1-3 Adianu tanü asen jenokdak shiba ta yua lir aji nentaka shisadangdi. Amen.

Florida nung aliba Arogo ka nung inyaker kati sen 875,000 auya

November 23, 2024: US nung ketdangsertemi, Florida nung aliba Arogo ka nung küm 25 tashi inyaker ka jail nung puoktsü, kechiyong lai dollar sen 875,000 auyaogo, ta metetdaksü. Middle District of Florida nung US Attorney's Office-i, arrshi küm 45 Heather Darrey-i taküm June ita nung lai ochimashi mapa inyakba nangzüka liasü; la ita 27 jail nung puoktsü obendang agütsüogo, ta metetdaksü. Osangbener den jembidang Arogo nung putir Len Plazewski-i, iba osang ajanga Arogo züngsemtem kanga aoksar, kechiyong Tampa nung aliba Christ the King Catholic Church nung züngsem ajaki Darrey ya temeim aketba nisung ka ama züngshia liasü, ta ashi. Arogo nung Record &

finance minister, Darrey-i Arogo nung inyaker nem cheques agütsüba software la ket nung liasü. Yaküm October ita nungibo Darrey-i ochimashi mapa inyak tenzuka liasü. Lai item senji mortgage payments nung indok, gari aser rong aliba den süoshi aser tanga nungdak balala nung amshiba sentsüh oa liasü. Arogo nung finance department-i senotsü amshiyim nung melung melemteti akümba sülen taküm March ita nung Darrey dang asüngdangya. Iba sülen la Arogo nungi jendok saka lai Arogo dang iba osangji police nem temetdaksü, ta mepishia liasü. Putiri Plazewski-i, "Nisung karbo pelar masü saka tamang raksatsüba aser ozüng alema inyakba atema temerenshi lir. Iba tatalokba ya tejashitsüka lir," ta ashi.

AO OSHI ANGAZÜKDAK:

TANÜ ANGAZÜKTSÜBA OJANG

Tashibangtsü

(n) tim masüba yimya, tesem aser maparen (taboo)

* Aor sobaliba nung tashibangtsü aika lir.

Tashikang

(n) temang nung yima odaktsüba shilem (wings)

* Mongnü tashikang kanga tashi tait lir.



OLONG PAITEP # 6991

Grid for OLONG PAITEP # 6991 with numbered squares 1-18.

TIPLIN

- 1. Inyaker ajangtetba - (3)
3. Bangsemo adokdak - (5)
6. Shitak mesü inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S ____ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaket - (4)
14. ___ hi - (3)
16. Akümüli nungi pilar - (3)

OLONG PAITEP # 6990 TELANGZÜBA

TIPLIN :

- 1. Tansütsü, 3. Am, 4. Ano, 7. Ama,
8. Tulus, 10. Manen, 11. Neb,
13. Oja, 14. Or, 15. Tepenjem.

LANGTSÜNGLEN :

- 1. Temoktenü, 2. Songtem, 3. Aka,
5. Langkotem, 6. Olung,
9. Rongjen, 12. Ber.

NAI-A YA METETTER MA




The Guinness World Record Day 2024 tenüing nung alima nung tar talangtiba tetsür Rumeysa Gelgi aser tatsütila Jyoti Amge na London nung ajurutep aser idangji tena nem Guinness World Record 70th anniversary edition tetushi agütsü.

Rumeysa (27) ya Turkey nungi researcher aser web developer ka lir aser la tar metre 2 ser inch 15.16 talang lir.

Jyoti Amge (30) ya India nungi actress ka lir aser la tar 62.8cm lir. November 13, 2024 nü The Savoy hotel nung ayongzuka agiba Guinness World Record Day 2024 nung tena nem tetushi agütsüo.

Kaziranga nung International Tourism Mart amongtsü



Guwahati, November 23, 2024 (Agencies): November 26 nungi 29, 2024 tashi Assam kübok Kaziranga nung 12 buba 'International Tourism Mart' ayongzuka amongtsü.

International Tourism Mart ya kümshia Union Ministry of Tourism ajanga ayongzük. Northeastern region nung domestic aser international audiences dang tourism

lenmang sadema aliba sayutsü atema iba sentong ayonger. Iba sentong ajanga Northeastern states- Assam, Arunachal Pradesh, Manipur, Meghalaya, Mizoram, Nagaland, Tripura aser Sikkim nungi tourism businesses aser entrepreneurs sabang ka nung adenshidaktsür ta tourism ministry-i ashi.

Kaziranga National Park and

mapa takok ngua inyaktsü" ta retired police officer Thangjam Brojen-i ashi. "Sorkar rejutem aika samaogo aser iba atema khuret süa bilemer. Ketdangsubaren ameta alirtemi mapa inyaktsüla aser tekaratiba nung ozüng alema inyaksangshiba azüoktsüla" ta Brojen-i ashi. Manipur nung police stations 6 nung Armed Forces (Special Powers) Act (AFSPA) tanaben benokba atema osangbenertemi asüngdangdang "AFSPA ya state kübok tesem aika nung benshia aru saka tensa kasa dang lir" ta pai langzü.

Tiger Reserve ya UNESCO World Heritage Site ka lir aser tezü ka aketba güntok talidak lir ta ministry-isa ashi.

Iba tourism mart nung nisung 400 shi shilem agütsü ta Tourism Director General Mugdha Sinha-i ashi.

Nisungtem rongnung international aser domestic tour operators, hoteliers, homestay owners, tourism service providers, influencers, opinion makers, Central & state ketdangsurtem, media professionals aser international students dena lir, ta pai ashi.

Anogo asemnü sentong nung state sorkartemi presentations sayutsü, B2B meetings, panel discussions, food demonstrations, cultural evenings, live music aser Northeast Bazaar alitsü ta Sinha-i metetdaksü.

Iba mapang nungsa Charaideo Maidam, Kaziranga National Park and Tiger Reserve, Hathikuli Tea Estate aser Orchid and Biodiversity Park semdangtsü ta paisa shisem.

Manipur sensotemi Jiribam nung nisung tepsetba aitsür

Imphal, November 23, 2024 (Agencies): Imphal West kübok Keishampat nung Honibarnü mener ola madoki lungkak aitba sentong ka agiogo.

Iba sentong ya Taragi Cheisu ajanga ayongzük aser teintet rogotem o tanga telok aikati shilem agi. Jiribam district nung tai maketba tanurtem aser tetsür ka tepsetba aija iba lungkak aitba sentong agi. "Central forces company talila lezmüksüba agidangbo tanga ajurua aliba tebilemstütem mekoktettsü. Central forces timi mapa lezmüksüba ajanga

mapa takok ngua inyaktsü" ta retired police officer Thangjam Brojen-i ashi.

"Sorkar rejutem aika samaogo aser iba atema khuret süa bilemer. Ketdangsubaren ameta alirtemi mapa inyaktsüla aser tekaratiba nung ozüng alema inyaksangshiba azüoktsüla" ta Brojen-i ashi.

Manipur nung police stations 6 nung Armed Forces (Special Powers) Act (AFSPA) tanaben benokba atema osangbenertemi asüngdangdang "AFSPA ya state kübok tesem aika nung benshia aru saka tensa kasa dang lir" ta pai langzü.

"AFSPA mebenoki policies aser programmes shitak yanglura mangatettep ken o angatetteptsü akok" ta Brojen-isa ashi.

November 16 nü Manipur kübok Imphal Valley nung MLA tem ki raksatsüba aser rongdoktsüba nung shilem agir nisung ana puogo.

Tang tashi nung iba ken o dak sendakba nung nisung 34 tashi pu lir.

November 16 nü Imphal Valley nung ki rongdoktsüba dak sendakba nung osangtem metetpeladar aser temulung malemer talila aputsü bushitepdar ta police-i ashi.

Gambegre by-election nung CM Conrad kinungtsü Mehtab-i takok angu



Shillong, November 23, 2024 (Agencies): Meghalaya Chief Minister Conrad Sangma kinungtsü Mehtab Chandee Agitok Sangma-i Gambegre by-election nung takok nguogo.

NPP candidate Mehtab-i votes 4,594 agi All India Trinamool Congress candidate Sadhiarani Sangma madak

takok angu. Congress candidate Jingjang Marak-i tasembuba jenjang nung takok angu. "Dr. (Mrs.) Mehtab Chandee A. Sangma-i 56-Gambegre by-election nung takok tulu anguba atema tenüngsang agütsür. Gambegre nung alirtemi temelenshi aser terenlok aginüba sayuogo" ta

NPP-i metetdaksü.

Meghalaya Chief Minister Conrad Sangma-ia Gambegre Assembly constituency nung alirtem dang pelaba metetdaksü.

"Parnoki onok teimlatem agizüker. Gambegre nung alirtemi onok nungitba aser temulung alemba atema kangasa pelar" ta pai ashi.

Congress-i iba constituency nung küm 10 tema takok ngua aruba Mehtab-i atsüngdokogo.

2023 Assembly elections nung NPP-i Gambegre constituency nung tanabuba jenjang menguteti liasü.

Congress lennir Saleng A. Sangma-i iba menden nung kümsük asemnen tashi atongtepa takok nguyonga aru. Taküm Tura Lok Sabha elections nung pai takok anguba ajanga iba menden tazüing aküm

Israel-i central Beirut amak; nisung 4 asü



Volunteers aser tekümkertemi Beirut kübok Basta tesem nung Israel-i missile agi raksatsüba ki ka nung taküm alirtem kümzüksü merangba noksa nung angur.

Beirut, Yimpoksüi/ November 23 (Agencies): Israel-i yokba missile pongu agi Beirut teyong nung nisung aika aliba tesem ka nung nisung aliba ki ka raksatsüogo.

Israel-i Lebanon nung maneni Hezbollah pur anema jenjang agia arudar aser iba mapang civilian meyirejang aika taküm samaogo.

"Linük yimtiba Beirut nung tanep lendong tulu adokogo, kechiyong Israel indang air force-i Basta kübok Al-Mamoun yimtung nung tiben atongtepa tua sür aliba nisung aliba ki ka missile pongu amshia ajunga raksatsüogo," ta National News Agency (NNA)-i Honibarnü sangdong ka ajanga metetdaksü.

Iba ki amakba mapang nisung pezü süogo aser nisung 23 yiruogo, ta Ministry of Public Health-i ashiba, Hezbollah indang al-Manar TV sangdong ka ajanga metetdakja liasü.

Beirut nung Al Jazeera osangbener Zein Basravi-i ashiba agi, anüing ajanga kanga sashia amakba sülen iba ki meket aliba kitem kanga mejungi raksatsüogo.

"Honibarnü iba tesem amakba densema Israel-i iba hopta tang agi pezübenbuba central Beirut makogo," ta pai ashiba den iba ajanga tawa tekümdangtsü kecha magütsü nisung aika aliba tesem missile amshia aiben amakba yimya ka sülen anidakba sayur, ta paisa shisem.

Missile tem yagi Beirut Honibar anepdang 4 ako nung kongshi aser security sources-i ashiba agi, iba tesem amakba mapang bomb pezü tsükdakja liasü.

Lendong atalokba sülen tekümkertemi takokba tashi jenjang agia nüburtem nem teyari agütsüogo.

Israel military-i Beirut amakba mapang timba southern suburb nunga tesem balala amaker, koba Hezbollah pur amendak aliba tesem ka ta züingshir.

Taoba Deobarnü Israel-i anüing ajanga central Beirut kübok Ras al-Nabaa district amakba mapang Hezbollah otongdar Mohammad Afif tepset aser Hokolbarnü southern Beirut nung 11ben tashi atongtepa tua sür aliba ki ka ajareptsüogo.

Israel military-i Honbarnü Beirut indang southern suburb kübok Al-Hadath, Choueifat, aser el-Aamroussieh nung alirtem nem tetuyuba tasen ka agütsüogo.

"Nenok Hezbollah indang facility aser parnok inyaksangshiba tesem anasa amenoka lir aser item tesemtem ya Israel military-i tarutsü nung amaktsü," ta military indang Arabic oshi otongdar Avichay Adraee- social media sabang X ajanga metetdaksü.

Israel military-i tesem balala mamak tsüngda yimya agi nüburtem nem tekümdaksü metetdaksür. Parnoki Lebanon aser Gaza naprongla nung tekümdangtsü metetdakja arudar, ajisüaka tesem ka amaktsü minute ishika dang lia iba tekümdangtsü metetdaksür.

Tekümdangtsütem ya timba nüburtem mejanga aliba mapang ayaterem nungang agütsür mesüra tetuyubatem shitak magütsü arudar.

Hokolbarnü Ministry of Public Health-i ashiba agi,

Israel-i linük south len tesem kar amakba mapang healthcare workers pongu tepsetogo.

World Health Organization (WHO)-i ashiba agi, taoba küm October ita nungi Israel aser Hezbollah na raratep tenzüka sülen Lebanon nung health workers aser shiranger 226 tepsetogo.

Gaza nung rara tenzüka sülen Lebanon nung Israel-i tesem balala amakba mapang nisung 3,645 tepsetogo aser nisung 15,355 yirutsüogo.

Israel-i Gaza amakba anema Lebanon nung amendaker aliba Hezbollah teloki Israel amak tenzük. Iba telok nem ya Iran-i teyari agüja arudar.

Rara ya mezüngbo arrtsü anasa dang raratepa liasü, aser ajia military tamendakdak balala dang maktepa aruogo, ajisüaka tawa telok anapronglai linük teyongtsü nung aliba tesemtema dena makdar aser iba den civilian tem aliba tesemtema maka arudar.

Kasa mapang nung Israel-i Hezbollah telok nungi tongtibang lenirtem aika tepsetogo, ajisüaka parnok maneni tashi ita inyaksangshia arudar.

Maneni Gaza pusema Yemen nunga Iran-i teyari agütsüba Houthi teloki Israel anema jenjang agia arudar. Parnoki temerem Tzüyim nung Israel den sendaktepa aliba rongtem maka arudar aser iba den Tel Aviv densema Israel kübok tesem balala maka arudar.

Gaza nung rara manen tashi parnoki iba jenjang agitsü tang nanzüküer Houthi telok item jenjangtem agia arudar.



Paris: Caetano yirpu ajanga rürjeb kanga sashia tsükba sülen France nung ki 170,000 shi nung electricity maka kümogo, ya French Minister of Energy Transition Agnes Pannier-Runacher-i ashi. Osangbenertem den sensaksemba mapang Pannier-Runacher-i ashiba agi, power network raksar aliba yanglushitsü atema mapa inyaker 1,400 shi yokogo.

Russia-i rara nung missile tasen amshitsü: Putin

Moscow, Yimpoksüi/ November 23 (Agencies): Missile tesashi tasentem amshitsü atema Russia renema lir, ta tir Vladimir Putin-i ashi. Russia-i Ukraine kübok Dnipro yimti nung ballistic missile tasen ka khaloktsüba sülen anogo ka lir Putin-i iba olen lemsatepa liasü.

Russia nung lenir yagi ashiba agi, Oreshnik missile ya tom nung khadangtsü makoktsü ta ashiba den iba missile ya rara nung densema talila tendangtsü.

Ukraine-i iba hopta mezüngbuba US aser British indang missile tem Russia dak khaloktsüba sülen Russia-a Oreshnik missile ya amshia liasü.

Ukraine tir Volodymyr Zelensky-i, linük balala lenirtem dang, Putin-i pai jenjang agiba ajanga parnok akoksaba angatetdaksütsü atema telangzüba tesashi agütsütsü ayongzükogo.

Ukraine-i anüolen aliba linüktem dang air defence system jenjang ajungkettsütsü asüingdanga arudar, ta pai ashi. Interfax-Ukraine news agency sangdong ka ajanga ashiba agi, Kyiv-i US indang Terminal High Altitude Area Defense (THAAD) meshitsü mesüra Patriot anti-ballistic missile defence systems ajungkettsü atema merangdar.

Hokolbarnü Putin-i ashiba agi, Oreshnik hypersonic missile ya sound dang nungi terben agi tekaraba ayimer aser iba missile ya yanglutsü atema tetuyuba agütsüogo. Paisa, Ukraine-i Storm Shadow aser Atacms missile amshiba atema telangzüba agüja iba missile amshio, ta ashi.

Brehostibarnü Dnipro amakba ya balaka liasü, ta tenük kuli agütsürtemi shiogo. Missile khaloktsüba sülen explosion ya

ghonda asem tashi süa liasü, ta parnoki ashi.

Tashi tait missile ka dena amshia iba yimti amakba sülen Ukraine nung ketdangsürtemi ashiba agi, iba missile ya intercontinental ballistic missile (ICBM) mesüker.

Risk advisory company Sibylline ngutetsang aser CEO Justin Crump-i BBC dang ashiba agi, Moscow-i tekümdangtsü ama iba missile amshio, koba parnok indang missile tem rongnung tekaraba aser tajungba lir. Iba missile ya Ukraine indang air defence-i menokdangtetsü akok.

Iba hopta tensa tamajungba akümba sülen linük balala lenirtemi tekümdangtsü metetdaksüogo. Poland Ato Kilonser Donald Tusk-i ashiba agi, rara ya telemteba ka agitsüba mapang ka tongogo aser rara nung linük balala densemetsü ana nung lir.

Hungary Ato Kilonser Viktor Orban-ia, anüolen aliba linüktemi Putin-i tekümdangtsü metetdaksüba angatsüla, kechiyong Russia indang policy tem ya military tashi dak amendaker lir, ta ashi.

Kasa mapang nung North Korea lenir Kim Jong Un-i, taoba mapang dang nungi nuclear amshia raratsü asoshi tang anasatiba nung lir ta ashiba den Pyongyang anema policy balala benokba asoshi US aitsüogo.

North Korea-i Ukraine den rara nung Russia nem teyari agütsütsü atema sepai meyirejang aika yokogo.

Kasa mapang nung US tir Biden-i ashiba agi, Moscow-i North Korea nung sepaitem amshiba atema telangzüba agüja Russia telung nung longer-range Atacms missiles amshitsü atema Ukraine nem temelaba agütsüogo.

US Treasury anitsü atema Trump-i Bessent nominate süogo

Washington, Yimpoksüi/ November 23 (Agencies): US Treasury Department anitsü atema Donald Trump-i Scott Bessent shimogo. Iba mapa ya sorkar kübok mapatem rongnung tongtibangtiba ronung ka lir. Iba department yagi tax policy, public debt, international finance aser sanction tem achaayanger.

Tanabuba term atema par team yangluba mapang president-elect asoshi iba telemteba agiba ya kanga tongtibang asütsü.

Bessent ya Wall Street financier ka lir, shiba mapang ka nungbo George Soros atema inyakogo. Bessent ya 2024 küm tir election atema tetenzük nungi Trump pusemer ka liasü.



Scott Bessent

Hokolbar aonung iba mapa atema arishi küm 62 tain Bessent shimba sülen, January ita tir mapa magizük tsüngda Trump indang team tabensar dang lir. Pai cabinet aser White House atema lenirtem aika shimba sangdonga arudar.

ALI AYOKER

FOOTHILL LEMANGANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

Jaiswal-i McCullum ajateta world record ka yangluogo



Yashasvi Jaiswal

Yimpoksuü/November 23, 2024 (Agencies): India nunger lanur asaya Yashasvi Jaiswal-i Test nung maneni kanga junga asaya-a kum ka nung Test asaya nung six timtiba azukba asayar kumogo.

Arishi kum 22 tain asayar yagi Australia den Perth nung Honibarnü mezungbuba Test asaya tanabuba anogo iba alizung tongteta liasü.

Mezungbuba innings nung duck achiba sülen Jaiswal-i tanabuba innings nungbo out mesüi run 90 yanglur lir, kong four tenet aser six ana densema lir.

Tanabuba innings nung six ana azukba sülen Jaiswal-i 2024 kum Test asaya 12 nung six 34 zükogo.

Nathan Lyon-i ball aonba mapang long-on leni six ka

züktoeba sülen taoba mapang New Zealand captain Brendon McCullum-i kum ka nung six 33 züka otsü tasen ka yanglur aliba Jaiswal-i ajatetogo.

Jaiswal 2024 kum tang agi Test asaya 12 buba nung asayadar. 2023 kum mezungbuba India team nungi Test nung asayaba sülen Jaiswal-i takum double century ana tashi yangluogo. Visakhapatnam aser Rajkot na nung England den asayaba mapang pai double century yanglua liasü.

Iba den bendenloksema pai ano half-century ti yanglur lir. Pa indang average 57.47 aser strike rate 73.10 lir.

Jaiswal ya India nunger asayatem rongnungi kum ka nung Test asaya nung run 1000 yanglurtem rongnung tanobusang kumogo. Taoba ita New Zealand den tanabuba Test asayaba mapang pai iba alizung tongteta liasü.

Perth nung mezungbuba asaya ya India-i amokbanger asayadar aser parnok run 218 agi tejakdang lir. Tanabuba innings nung Jaiswal aser KL Rahul (62 not out) nati out mesüi run 172 yanglur tananububa asaya tembanga liasü.

Harry Kane-i Bundesliga nung otsü tasen ka yangluogo



Bayern Munich aser Augsburg na Allianz Arena Munich, Germany nung asayaba mapang Bayern nungi asayar Harry Kane-i penalty ka metsüa par team atema goal ka idaktsüba noksa nung angur.

Yimpoksuü/November 23, 2024 (Agencies): Harry Kane-i otsüsütsüsa Bundesliga nung asayatem ajak rongnung goal 50 takaratiba idaktsüogo. Pai asaya 43 nung dang iba alizung tongteta liasü.

Bayern Munich-i goal 3-0 agi Augsburg akokba asaya nung hat-trick ka idaktsüba sülen pai iba otsü tasen yanglua liasü.

Asaya nung Kane-i goal asem idaktsüba nung penalty ana densema lir aser iba asaya akokba sülen Bundesliga table nung Bayern maneni temaba jenjang nung lir. Round 11buba nung tanungba asayatem manei asayayonga aoba mapang Bayern pur tanabuba jenjang nung aliba team dang nungi point ti agi timba lir.

2021 kum Borussia Dortmund nungi asayaba mapang tang Manchester City striker Erling Haaland-i asaya

50 nung goal 50 idakja otsü tasen yanglur aliba tang England captain yagi ajatetogo.

Kane 2023 kum Tottenham nungi oa adenba sülen pai league nung hat-trick tenetbuba idaktsüogo.

Taoba season Kane-i Bayern nung kanga junga asaya aser league asaya 32 nung goal 36 idakja liasü.

Ajisüaka Bayern puri taoba season junga masayateti Bayer Leverkusen sülen tanabuba jenjang nung tembang, shirnoki khen danga tamakok monugi Bundesliga title bena liasü. 2012 kum nungi Bayern-i league koka arur taoba season parnoki Leverkusen majangteti liasü.

Tang asaya aliba season nunga Kane-i kanga junga asaya arudar aser Bundesliga nung goal 14 idaktsüba den Champions League nung goal pongu aser German Cup nung goal ka idaktsür lir.

Netherlands team-i tang mezungbuba Davis Cup final tongogo



Netherlands team-i takok ngur pelatepba noksa nung angur.

Yimpoksuü/November 23, 2024 (Agencies): Tang asaya aliba Davis Cup nung Hokolbarnü Germany team 2-0 agi akokba sülen Netherlands team tang mezungbuba Davis Cup final-i iogo.

Hokolbarnü mezungbuba kija asaya nung Botić van de Zandschulp-i kanga meranga asayar 6-4, 6-7 (12/14), 6-3 agi Daniel Altmaier koka liasü.

Iba sülen tanabuba kija asaya nung Tallon Griekspoor-i 6-7 (4/7), 7-5, 6-4 agi Jan-Lennard Struff koka iba asayamung asembe tashi koker aliba team ya semifinal nung tsükdaktsüogo.

Netherlands team-i quarterfinal nung Rafael Nadal'er Spain team Mongolbarnü tsükdakja liasü. Kum 104buba nung tang mezungbuba Netherlands team-i iba asayamung final tongtetogo.

"Team ajungai longjemer asayaba ajanga takok nguteta arudar. Kum asembe atonga quarter-finals nung tsükba sülen takumbo metsüktsü onok nukjidong liasü aser onoki akoktsü ta tamang ka-a liasü," ta Haarhuis-i ashi.

Germany team-i iba asayamung tesüsa 1993 kum koker lir aser final trokbuba asayatsü imla liasü.

"Tanü Netherlands team-i maongka ka ana onok dang nungi tali tajungba agitetogo aser iba asaya akoktsü parnoki langa liasü," ta Germany captain Michael Kohlmann-i ashi.

Semifinal nung Van de Zandschulp-i mezungbuba kija asaya ghonda ka ser minute 44buba nung koka liasü.

Mezungbuba set nung asayar anapronglai kasasa dang asaya tur Zandschulp 5-4 agi tejakdang akum aser pai pa

indang service game mekokdaktsüi asaya koka liasü.

Tanabuba set nunga Zandschulp-i game pongububa nung serve ka break asü aser 4-2 agi tejakdang kuma asaya azüoker asaya, ajisüaka Altmaier-i pa menepa tur tanabuba set akok.

Tasembuba set nung Zandschulp-isa, Altmaier indang serve ka break süa pa 5-3 agi tejakdang akum aser asaya koka liasü.

Tanabuba asaya nung Struff aser Griekspoor napronglai mezungbuba set nung serve ka danga break mesütet aser iba sülen tie-break asayaba sülen Struff-i asaya koka liasü.

Ajisüaka iba sülen tanabuba aser tasembuba set ya Griekspoor-i koka Netherlands team tang mezungbuba iba asayamung final nung asayatsü asoshi maongka ngutetogo.

Tilak Varma-i T20 nung century asem atonga yanglu

Yimpoksuü/November 23, 2024 (Agencies): India nunger batter Tilak Varma-i Honibarnü Syed Mushtaq Ali Trophy nung ball 67 nung run 151 yanglua India nunger asayatem rongnungi T20 cricket nung run 150 dak tema yangluba mezungbuba asayar kumogo.

Kasa mapang nung Tilak ya T20 cricket asaya nung century asem atonga yangluba mezungbuba asayar kumogo. Tawa South Africa den asayaba mapang century ana atonga yangluba sülen pai Honibarnü century ka yangluogo.

Niranjan Shah Stadium, Rajkot nung Hyderabad tenüng nungi Meghalaya den asayaba mapang Tilak'er team-i over 20 nung asayar 4 out sür run 248 yanglua liasü.

Asaya nung Tilak-i four 14 aser six 10 züka liasü. Iba asaya nung pa indang strike rate 225.37 liasü.

Varma-i ball 11 nungdang run

meyanglutet aser pa indang dot-ball percentage 16.42% dang liasü.

Iba asaya ajanga pai asaya kanga junga aziüoka asayaba aser asaya kanga junga jangja aliba sayuogo. Varma ya tawa Indian Premier League (IPL) 2025 season atema Mumbai Indians puri retain süogo. Iba asaya nung pai single run 29 aser double run asem yanglu aser iba ajanga pa boundary dak dang metaloker masayai strike kanga junga rotate süa asayaba sayuogo.

Varma-i kanga junga asayaba sülen Hyderabad team jenjang kanga junga toktsü aser Meghalaya team asoshi run meneptsü kanga zubarabo mesüi akum.

Fan aser mongintemi iba otsü tasen yanglutetba atema tenüngsang agütsüba mapang Varma maneni temaba jangjai tudar aser pa ya repranga atatsü nungdakba asayar ka kumogo.

BILEMDANGANG
"Aibelen mesüi angazüktsü tasak."